



# 《西方確指》

---

## 讀 本

---



金鼎大學研究院文獻研究所

# 目 錄

第一章	教起因緣 .....	3
第二章	學佛通法 .....	4
第三章	信向極樂淨土 .....	8
第一節	捨幻歸真修深信 .....	8
第二節	棄邪崇正修正信 .....	9
第三節	隨機化導修淨信 .....	12
第四章	切願求生極樂 .....	16
第一節	發願 .....	16
第二節	修願 .....	17
第五章	起修預備 .....	19
第一節	外緣預備 .....	19
第二節	心理預備 .....	24
第六章	念佛之法 .....	22
第一節	主修 稱名觀聲念佛之法 .....	22
第二節	助修 祛執除障之法 .....	23
第三節	正修 憶念念佛之法 .....	27
第四節	念佛教理 .....	29
第五節	念佛三昧 .....	30
第七章	行持之法 .....	32
第一節	居家行持之法 .....	32
第二節	出家行持之法 .....	33
第三節	行持通法 .....	34
第八章	淨業助行 .....	39
第九章	付囑勉勵 .....	45

# 第一章 教起因緣

## 〔一〕通序 六種成就

### 第一品 法會開啟

一時，菩薩自極樂國來，降於娑婆震旦古勾吳地。  
在會弟子以往昔因緣，得蒙化度。

## 〔二〕別序

### ①緒論啟信

### 第二品 概說教法

菩薩將顯淨土法門，而說偈言：

諸佛之法要，微密不思議；  
以非思議故，無能盡宣說。  
牟尼大慈父，悲憫眾生者；  
說所不能說，導彼今後世。  
更以異方便，顯示安樂刹；  
令發願往生，橫截諸惡趣。  
由佛阿彌陀，大願攝群品；  
聞名能受持，決定生無惑。  
若有大力人，專念心常一；  
成就深三昧，現前亦見佛。  
今我如佛教，將開化導門；  
念爾等迷倒，確指正修路。  
是非弱小緣，應具難遭想。

西方萬億程，一念信即是。  
菩薩說偈已，令諸弟子朗宣一過。

②導正歸信

第三品 授受皈依

（菩薩）復言：「汝等向來學宗玄術，心溺邪修。我以夙緣、慈念深故，來此化導。今已首標「西方淨土」為正向正修一門，猶慮未能極信；次當說我名號及我所證，令知：說是法者是大菩薩。善男子，我昔因中，以妙湛覺心，照明一切諸所有剎土，眾生所同具足。即以覺妙妙覺覺明妙心，起無量妙行，度諸眾生。是故，阿彌陀佛印我名號，號曰：『覺明妙行』。汝等從此皈依，更無疑二。」

時，同會者八人，俱合掌，至心念：「南無覺明妙行菩薩！」敬禮而起。

菩薩曰：「善哉！如是。」

第二章 學佛通法

〔一〕學佛總綱

第四品 修學三要

或問：「持經、咒之法？」

菩薩曰：「所謂『持經、咒』者，自持其心也，要在直明心地。若止云，持得熟，誦得多；又念某經、

某咒、某佛，謂：『我有大功德！』而不能句句銷歸自性，又不能深解如來妙諦，謂：『可以獲果證』者；不見十字路口，若無眼、若無足、若乞婦、若乞男，終日不住口念到夜。計其所持，一歲何啻數十萬遍，究竟是殘疾者、求乞者，並不曾證得一毫果在。此何以故？只無解、無行故耳。故知：持是經，即當依是經而修行。又發大願：或求生佛國，或求明心地，或發大智慧，或利濟眾生。俱仗如來廣大弘通之力，以成就行人之願。如是，方為持經、持咒、念佛。」

## 〔二〕學佛目標

### 第五品 了脫生死

天然老僧以久病不癒，欲入徑山待死，投骨普同塔中。

菩薩曰：「汝欲住山待死，是無事討事耳。汝愁幾根老骨頭沒處安頓耶？不知眼光落地，直伸兩腳，任他刀砍、斧斫、火燒、水浸，與爾無干。乃為他作久遠計，亦太愚矣！且此身生時尚是無益，何況死後？汝今宜簡省諸事，單持一句『阿彌陀佛』，念念不捨。阿彌陀佛便與汝為好伴侶，大限到時，現身接引。得生極樂，豈不愈入山待死耶？又，生、老、病、死是世間難免之苦。汝即久病，亦莫管他癒不癒。但一念一心，生也由他，死也由他，便了。」

### 〔三〕學佛基礎

#### 第六品 遵善持戒

僧不二將投師受戒。

菩薩曰：「惜哉！惜哉！堂堂相貌，表表儀形，不知自反。計其所作，與俗人無異。吾見汝身在此處，而神遊地獄矣！急宜痛加修省，斷惡遵善；上求佛果，下化群生。不可昏昏昧昧，失此有限光陰，自貽萬劫之累。

「至受戒一事，不受則已，若一受，更不得分毫毀犯。當守護清淨，如白璧、明珠，了無瑕玷，斯成戒品。蓋『戒』為三世諸佛入道根本，勿同兒戲。

「又，若住靜參方，更宜親近善友，遠諸庸劣。『親善則道業易成，近惡則戒行易失。』此二語終身學道之要。慎之！記之！」

### 〔四〕實修通則

#### 第七品 積功累德

馬永錫兄弟夙世為獵戶，一日入山共殺一鹿，當獲短命報。又嘗見塔中佛像仆地，扶起安座，禮拜而出。以善因故，再得人身。菩薩先為永錫開示已。永錫懼，求永年之道。

菩薩曰：「昔北方妙覺寺有童子沙彌，年十六。時，有一相師，說人生死，不爽毫髮，謂沙彌言：『汝年十八季秋當死。』沙彌恐甚，夜禱於佛：『願於藏

中賜經一卷，終身受持，以祈長壽。』言已，悲泣不勝，再拜而起。於大藏中，隨手取得《金剛般若經》。遂書寫受持，曉夜無懈。兼持戒精嚴，了悟玄理。年未四十，道風流播，四眾歸仰。後至八十坐化，即洛陽微行禪師也。為唐玄宗開元六年事，我所親見。

「汝今既怖短命，欲求永命。當依此沙彌，求《金剛》善本，發心書寫，勤行讀誦；復求解義趣。此內功德也。從今日始，不得更殺物命，當愛如己身；又多積陰德。此外功德也。內外俱修，功德甚大，自能與天合體而夭壽不二之理立矣。何慮年壽之不永乎？然須慎終如始，如彼沙彌，八十而不怠，方為合道。切莫有頭無尾，或行十日半月、一年兩歲，便丟手了也。若果盡形遵奉，先後無間；不遂所求，諸佛及我俱墮妄語。」

#### 〔五〕修學時程

### 第八品 持志久遠

菩薩示陳定崑曰：「汝父子奉行我教，最為難得，但必持志久遠。不得便生感應希求之念。將『修行』二字，正如日用間穿衣、喫飯之事，方可。」

#### 〔六〕學佛禁忌

### 第九品 機教不符

菩薩示查定宏母曰：「汝夙有向道之念，而未遇

正人，深為可憫！今當為汝分別開示。汝往昔為比丘時，力行精進，晝夜不怠。心猛烈故，於靜定中忽起一見，云：『我何故不能速得成佛？』

「又一日，聞『諸佛無相，即心是佛』之語，復益邪思，云：『既諸法空寂，我心是佛，何用修習？』不知此為究竟空理，而非初入法界所易言者。比丘從此竟墮邪見，不復進修，自謂：『已證大道』。所以，從迷入迷，沉淪長夜。悲哉！眾生求道，不遇真善知識，未免陷於羅網，不可不慎！

「汝今當知：由昔以見邪故，報獲五漏；失正知故，復遇邪師；毒螫親遭，豈得不生恐怖！今應速發正信，至心憶念『阿彌陀佛』，求生極樂國土。」

### 第三章 信向極樂淨土

#### 第一節 捨幻歸真修深信

##### 〔一〕示幻喻真

#### 第十品 身命虛幻

無朽為一友問：「得壽幾何？」

菩薩示偈曰：

「人命如朝露，虛浮無定期。

未能逃夢幻，何必預求知。」

復示曰：「且莫為他問日期，到臘月三十日，管取手忙腳亂在。」

是友果以次年臘月三十日疾終。

〔二〕導幻歸真

第十一品 理入一真

無朽聞說，遂求開示。

菩薩曰：「元柏當知，學道而不明此心，譬如造屋無基，渡水無筏。欲明心者，當微細觀究：此身、此心，從何而有？既四大虛幻，心將誰寄？身心既幻，世界微塵了無差別；目前萬法，從何處生？從何處滅？若無生滅，則照與能照兩無所依，自見真如寂滅場地。」

〔三〕深信依真

第十二品 淨土安身

勾曲孔生持齋二十年矣，自念衰老，問：「死後云何？」因泣下不已。

菩薩曰：「不須悲淚，但從我說，深信遵行，自有好處安身在。」

遂授偈曰：

「西方有淨土，人天皆所依。

汝能修此門，安穩無驚疑。」

第二節 棄邪崇正修正信

〔一〕分示邪正

### 第十三品 心邪心正

沈文州以傷寒名家，適至作禮。

菩薩問曰：「寒入心包，當作何病？」

答曰：「名『中寒』。」

因喻諸人曰：「汝等但知：寒入心包，名曰『中寒』之疾。若邪入於心，即為殞命之病矣！汝諸人但以身病為病，調之、治之。至於心有大病，則不問明醫，不求妙藥，任其患苦而莫之覺。哀哉！」

陳大心奉教念佛，極其誠至。

菩薩示偈曰：

「八德池中蓮已種，果然一念甚宏深。

滋培雖藉如來力，長養全憑決定心。」

又喻諸人曰：「此土有發願往生者，彼土即生蓮花，故作是語。汝等應生深信。」

#### 〔二〕闢邪導正

### 第十四品 正本念佛

孫中白好丹術，日久無效，因來會作禮。

菩薩呵曰：「老禿！今日換這副嘴臉見我麼？且問爾：金丹幾時可成？」

答曰：「正爾求成。」

菩薩曰：「若成了，千萬留卻幾顆，莫都喫到肚子裡去。俟汝見閻羅老子時，好做些人事送送。癡老兒！此事決無你份，不如做你本等去。」

孫拜謝。

有頃，菩薩又曰：「癡老兒！知得你自己本等麼？」

答曰：「我求『見性』，是我本等。」

菩薩曰：「汝知此『性』為大為小？為青為黃？」

答曰：「『性』無如是等相。」

菩薩曰：「然則，汝欲向甚處求見？」

孫無語，乃發信皈依，願為弟子，求示法名。

遂示以偈曰：

「『性』無大小青黃相，那有聲名任汝呼？

不達此中玄妙處，一言半字總淆訛。

「我今強為汝立名，可曰：『達本』。汝此後光陰不上七、八年矣。莫負卻八百年前三十六載苦行也。」

孫因問：「此身如何結局？」

菩薩曰：「結局便結局，又問如何結局耶？」

孫乃問：「如何修持？」

菩薩曰：「淨土一門，能廣攝群品。汝問修持，當念『阿彌陀佛』，發願往生，便得一了百了。汝無再惑。」

### 〔三〕明辨邪正

#### 第十五品 正法精簡

菩薩又喻諸人曰：「從古大聖大賢闡微立教，皆至精至簡。上士聞而悟，中、下聞而修，皆歸大道。乃後之著述，務為繁言隱說；使凡流揣摩成見；遂致以訛傳訛，深入邪僻。抱暗沒世，竟不自覺。如達本

因讀《參同》、《悟真》諸書，不知法要，曲信訛傳。謂為有得，執吝不捨。白首無成，動諸煩惱。菩薩說為『真可憫者』！是故，汝等既識前非，當崇正信。」

### 第三節 隨機化導修淨信

#### 〔一〕開演 觀機大法

#### 第十六品 觀 機 察 夙

一時，菩薩將臨法會。弟子八人：無朽、常攝、常源、定茂、達本、查定宏、陳定崑、查定敏，恭謹顛跏，齊唱佛號。忽聞異香，從空中來。眾皆歡喜，得未曾有。

菩薩曰：「善哉！善哉！爾等知今日之會，有夙因否？昔梁武皇天監六年，我出家於北魏之東都淨因寺，為大比丘。因避亂南遊，駐錫雞鳴山麓。時，爾八人依我修學。不久，以兵亂各散。我越後二載，示寂於武林天竺。後，復於唐僖宗朝，為清河獻王長子，亦棄位出家。今爾八人同會念佛，亦由我發心，正如往昔無異。但，爾等去我以來八百餘年矣，仍復飄流未反，真為可悲！真為可痛！今為汝等，重加發明所修行業，令速成辦，早登解脫。宜各諦聽！」

#### 〔二〕別法 應機化導

##### ①化導初皈

#### 第十七品 勸 堅 正 信

示無朽曰：「汝向者雖從事玄門，而能恭敬諸佛，當知即是夙因。今宜速發深心，精修淨業，為諸人倡導。無空擲後此一十三年光景也。付汝偈言：

「八百年前有勝緣，今來相遇指青天。

已知本地中秋月，莫向長江覓渡船。」

## ②化導他宗

### 第十八品 原門導昇

示常攝曰：「汝常持《大悲神咒》，云何而持？」

答曰：「所持之咒，歷歷分明。能持之心，了不可得。」

菩薩曰：「能如是持，是名『真持』。有偈囑汝：

「汝持《大悲咒》，應識大悲心；

離名亦離相，以此度群生。」

## ③化導鈍根

### 第十九品 深入淺出

示常源曰：「汝既出家，要須謙下柔和，敬事師長，虛己請益，增長志氣。莫只坐雲霧中過日。」

源不達。

復示曰：「汝懵懵若此！可曉得自己的心麼？」

源無語。乃令誦《準提咒》一遍。源隨誦之。

菩薩曰：「此不是你心，喚作甚麼？偈曰：

「見初無心，即汝本心。」

《準提》一遍，全體分明。」

④化導利根

第二十品 指授道法

示定茂曰：「汝持《準提咒》，平日須要細密用心。觀一切境，若喧若寂、若物非物、若欣若厭，無非此咒現體，即我妙心刻刻流露。如是奉持，必獲果證。我亦以神力助汝成就。當誦我偈：

「兩行秘密，即汝本心。  
莫謂法少，是法甚深。」

⑤化導狂禪

第二十一品 導禪入淨

問達本曰：「汝將云何？」

答曰：「欲明心。」

菩薩曰：「得無口頭話否？當勤念佛，其功十倍。亦示汝偈：

「心外無佛，佛即汝心。  
深信不惑，一念無生。」

⑥化導初機

第二十二品 善護初心

示查定宏曰：「汝持《金剛般若》，當知有『七不

持』。所謂：心昏散不持；有過犯不持；入不淨處後不持；飲酒後不持；人擾不清淨不持；有事將作未作不持；心別有記憶不持。若堅意受持，應離此七。誦至純熟，即於觀心中持之。果能如是，則功德不可思議，果報不可思議。佛有誠言，汝須保任。復與汝偈：

「《般若》一經，功德無盡。

拔妄想根，脫生死病。」

### ⑦化導宿儒

#### 第二十三品 導儒入佛

示陳定崑曰：「小人之為惡也，惟恐人知。君子之為善也，亦惟恐人知。汝當以君子慎獨之心，而作佛事。更有偈曰：

「勿貴人知，勿希天應。

恆一其心，必堅必正。」

### ⑧化導學童

#### 第二十四品 演說世法

示查定敏曰：「汝未及弱冠，已知向道，可驗夙因。今為汝命名曰『敏』。敏有聰、勤、妙、捷四義。聰以除汝暗，勤以勵汝怠，妙以開汝慧，捷以發汝廢。汝當顧名思義，莫謂菩薩徒與爾一箇字也。復示汝偈：

「汝年正幼，當學孝悌。

以是持身，毋惰其志。」

〔三〕通法 獎勸淨信

第二十五品 淨土最勝

是日，陳大心後至。

菩薩問曰：「汝云何修持？」

答云：「惟修淨土。」

菩薩曰：「捨此別無勝門矣。囑汝一偈：

「道無他說，唯心而已。

蓮胎始成，專精勿二。」

第四章 切願求生極樂

第一節 發願

第二十六品 捨身切願

菩薩曰：「所示淨土一門，真諸佛心宗，人天徑路。今汝等雖求往生，若發願不切，如入海而不獲寶珠，徒勞無益也。

「我昔於晉明帝時，受貧子身。為貧苦故，乃發大願，云：『我以夙業，受此苦報。若我今日不得見阿彌陀佛，生極樂國，成就一切功德者，縱令喪身，終不退息。』誓已，七日七夜，專精憶念，便得心開。見阿彌陀佛相好光明，遍十方世界。我于佛前親蒙授記。後至七十五而坐脫，竟生極樂。

「後，以度生願重，再來此土，隨方顯化。或為比丘，或為居士，或為國王，或為臣宰，或為女人，或為屠、丐，或隱、或顯，或順、或逆，皆隨順說法，導諸群品。又以仙道多未悟真常，耽長壽樂，不思進修。我現仙身，救其迷墜，如唐僖宗朝一事也。今則又為汝等發明邪正，闡揚淨土。汝等當一意一心，堅修此門，必不相誤。若心志一堅，又不待隔世而生，現前亦得見佛，如我昔年無異。有偈四句：

「少說一句話，多念一句佛。

打得念頭死，許汝法身活。」

## 第二節 修願

### 〔一〕修願之理

#### 第二十七品 離欲裂網

或問：「學人云何得離塵欲？得無障礙？」

菩薩曰：「我將由小而推之大，由外而推之內。汝等當善解其義。有人於此無故而奪汝一錢，動瞋恨否？」

答以：「一錢雖微，見奪則瞋。」

「又無故而與汝一錢，生喜悅否？」

曰：「一錢雖微，見與則喜。」

有答以「一錢甚微，與何足喜，奪無可瞋」者。

菩薩曰：「汝能如是，心之清淨久矣，何至今日尚沉濁垢耶？汝等當知，學人洗心不密，見『有』見『無』，處處是『著』，念念皆『貪』。所以業識紛

馳，無暫停止。即念一句『阿彌陀佛』，心想依然外遊，未能頃刻歸一。良由汝等於無量劫來，未嘗發一時一日遠離塵欲之心。故此，塵欲亦從無始劫來，未嘗一時一日肯離汝心。身纏心縛，深入塵網，那得如蓮花出淤泥而不染。」

## 〔二〕修願之法

### ①漸法

#### 第二十八品 觀心漸進

（菩薩曰：）「故知，欲斷貪著，先從一錢之與奪，作棄捨觀，作非我有觀。奪不起瞋，與不起悅。如是乃至百千萬錢，乃至億億萬錢；乃至國、城、妻、子；乃至身肉、骨髓；乃至過、現、未來心、意、意識；乃至生死業報、菩提、涅槃；……。一切皆如此一錢之與奪無異。自然習漏消亡，障緣永滅；漸履清淨，成就道品。汝等當依此修行，勿更自虞窒礙。」

### ②頓法

#### 第二十九品 徵心悟理

孟冬二日，為菩薩誕生之辰，眾設供稱壽。

菩薩曰：「汝等以何物壽我？」

皆曰：「心以為供。」

菩薩曰：「心是何物，可以持供？」

答曰：「唯一至誠，本是無物。」

菩薩曰：「既言無物，誰知至誠？能知誠者，定有處所可得舉示。云何『無物』？」

答曰：「實無所得。」

菩薩曰：「汝言無得，為是暫無？為決定無？」  
眾擬議未對。

菩薩曰：「無則決定無，有則決定有。一涉纖疑，毫釐千里。當知，汝等言『誠』言『妄』，說『有』道『無』，皆是起滅、計較、推詳、卜度之心。以是祝我，均無所益。聽我妙偈：

「至真無二心，至真無量心。

心非一切心，一切性非心。

除『妄』心不實，依『真』心強名。

真妄兩不立，南無釋迦尊。

了心無處所，方便福群生。」

## 第五章 起修預備

### 第一節 外諸緣預備

#### 〔一〕人事預備

#### 第三十品 擇師依師

時，諸弟子咸再拜，願更聞法要。

菩薩曰：「善哉！善哉！汝等願更聞法要，當誠解我語，善答我問。諸弟子！譬如有人謂一人言：『燕京，帝王所都，富貴無比。』是人聞言，有志往否？」

咸曰：「願往。」

菩薩曰：「汝不識路徑，當云何？」

咸曰：「有人指示，從之而行。」

菩薩曰：「不可。倘是人指以向南、向東，若不明辨，竟從其言，則燕都遠之又遠矣。」

眾曰：「然則如何？」

菩薩曰：「畢竟得一走過燕都之人，教是人曰：『汝須向北而往，便可直達帝所。』諸弟子！此人所指，有錯謬否？」

咸稽首曰：「無謬。」

菩薩曰：「又譬如，有人欲登萬仞之巔、九層之頂，當如何教之？」

咸曰：「從卑至高。」

菩薩曰：「然。古云：『千里之行，始於足下。』須是：『從第一級至第二級，……乃至最上一級』，方為正說。若云：『一步便跨到最高處』，為浪語矣。又，譬如有人，天子將命以官，詔是人曰：『汝願為宰相耶？小吏耶？』是人云何上答？」

咸曰：「必願為宰相。」

菩薩曰：「然。又譬如，有人在於歧路，不知所從。有憫之者，指曰：『是邊極難險、極曲折，不得便出頭；是邊極正大、極平坦，走去便得出頭。』其人受指，於此兩邊，當走何路？」

咸曰：「走正大，走平坦。」

菩薩曰：「善哉！善哉！爾等酬我所問，俱合正

理。然，爾等能明解我所喻否？」

咸再拜曰：「唯垂開示。」

菩薩曰：「善聽！爾等向來雖有求道之心，而不識修行之要，趨向無據，如人欲往燕都而不知路徑者是。若遇邪師，教以邪法，如帝都在北，而反指以往東、向南者是。則其人雖終日行，而茫無歸宿，何由覲至尊？何由成大道？今我所示彌陀淨土，帝都也；信、願、行三，勤加精進，終至往生，是從第一級至最上一級也；期登上品，是願為宰相，不願為小吏也；依此而修，是走正大而不行邪曲也。我即走過燕都之人也。若爾等不能深信，是捨帝都而趨邊地也；棄宰相之尊，而就小吏之賤也；背正大而求艱僻也。萬仞之山巔，九層之塔頂，非爾所及矣。可勝悲痛哉！」

## 〔二〕物資預備

### 第三十一品 清淨隨緣

眾欲積田為修行計。

菩薩曰：「汝等欲矢志同學，久聚不散，謝絕世故，於衣食所從不復為求人計，故發此議。以我觀之，念頭雖好，然畢竟是貪戀塵勞，非清淨法。何以故？街頭一飯，塚間一宿，先佛道範。若必藉田而修，倘一不就，則汝諸人終無修行之日矣。

「又，若言自無其貲，將出自『募化』，更為不可。佛一代教無此二字。蓋自末世不識禮義、不懼因果、不知廉恥之徒所為。真修道人生死念切，斷斷不

作是想。

「然，更有一言：汝諸人但執持正念，各各努力，是即不聚而聚。若身心散逸，事無常恆，是雖聚而實散。苟明此意，止應隨分隨時，莫去閒思預計。」

## 第二節 心理預備

### 第三十二品 牢固道心

菩薩又告眾曰：「汝等慮身纏世網，念頭不得乾淨耶？我有一法，汝但發個遠離、求度之願，將牢牢歸向極樂世界見阿彌陀佛之心，換卻奔走利名之心，便能即塵勞而覺路矣。」

## 第六章 念佛之法

### 第一節 主修 稱名觀聲攝心念佛之法

#### 第三十三品 聲心隨合

有問：「念佛不能一心，當作何方便？」

菩薩曰：「汝但息想定慮，徐徐念去。要使聲合乎心，心隨乎聲。念久自得諸念澄清，心境絕照，證入『念佛三昧』。然，平日必須多念，從千至萬，心無間斷，則根器最易成熟。若強之使一，終不一也。」

時，達本於座下，忽懼然念數聲。

菩薩曰：「如是！如是！」

## 第二節 助修 祛執除障之法

### 〔一〕離相祛執

#### ①離於身相

### 第三十四品 當 顯 佛 性

諸弟子欲造像供養，請示法相。

菩薩曰：「諸弟子欲造相供養，積誠已久，合當顯示。但汝塵勞中，我妙明內，即今顯現，汝等不能見也。又，我隨機感化，身相不一。

「今但從本起修，可畫作大比丘相：面如滿月，形體豐偉，著袈裟，坐蓮花上，左手置膝，右手作說法相。眉間放白毫光，光中有阿彌陀佛結跏趺坐。要須莊嚴相好，不得潦草。」

諸人聞已，皆拱立，思惟如是法相。

菩薩乃言：「諸弟子！人人有個覺明妙行，不即不離，在汝諸人摸索不著處，時時出現。即今明白，更不須設像供養，願見於他日也。」

#### ②離僧俗相

### 第三十五品 唯 務 實 修

查定宏因喪子，欲棄家為僧。

菩薩曰：「汝且莫妄想是事，是事汝做不得。汝但正心以治心；正身以治身。斷無益之事；絕無益之友。皈心大覺；願出迷途。挹彼洪波；滋我燥土。精求加被；驅諸障緣。汝向思祈壽保身，當注意力於此，

勿多言也。」

③離文字相

第三十六品 通達法性

定宏乃問：「奉教持《金剛經》，但諸字句有不同者。當從何本，得無差謬？」

菩薩曰：「『金剛般若波羅密』七字，並無差謬。」

〔二〕明理除障

①明達病理

第三十七品 念佛癒疾

沈天宇有疾，設供求示。

菩薩曰：「汝今有疾，尚未即死。當息諸牽累，安心端坐；念身無常，念世無常；所有妄緣，一切放下；徐徐念一句『阿彌陀佛』。自然六塵不生，一心清淨。不唯癒汝今生之疾，即生死病根，亦從此拔出矣。

「汝今設供求示，不過望我有甚好方與汝，口訣傳汝，可癒汝疾。豈知菩薩無是等虛偽之法，但此實實數言教汝而已。汝若信而行之，真一服上品還丹妙藥也。付汝一偈：

「病從己作，還由己除。

攝心清淨，得常安樂。

堅久不變，同無量壽。」

## ②明達教理

### 第三十八品 念佛明心

菩薩示達本曰：「汝欲究明心地，極為有志。但你一肚皮砂、鉛、水、火，『本來面目』、『真空』、『真淨』等話，實實塞卻，如何做得？你若要做，必須將此一絡索，拋向東洋大海始得。不然，枉卻用心，誤卻工夫矣。不如的的確確念一句『阿彌陀佛』；明心在是，生極樂在是。一舉而兩得，極是便宜也。」

## ③明達倫理

### 第三十九品 念佛大孝

無朽問：「云何仰酬祖父？」

菩薩曰：「世間所謂『孝』者，以何為上？」

曰：「能敬養，能為善，以無忘先德。」

菩薩曰：「此雖孝而有限。惟能發大願，修出世法。若道成果滿，豈但福及九祖，即歷劫冤親，俱蒙解脫。汝能專修淨土，是為大孝。」

## ④明達學理

### 第四十品 有門空理

定茂問：「持咒云何明心？云何究竟？」

菩薩曰：「心不離咒，咒不離心，是『持』之義。」

汝當於一切時，觀此咒體，與我心體，是一？是二？若云二者，云何心能持咒，咒能顯心？若云一者，云何忘則咒無，憶則咒有？則知此咒與心，離諸名相，畢竟空寂，是名『究竟』。

「若但『持』而不究竟，即無妙解，平等大慧云何顯發？平等大慧不現，何由照生死之昏迷，達三界之實際乎？」

### ⑤明達事理

#### 第四十一品 念佛保身

達本問：「出聲念佛，每易發火，得默念否？」

菩薩曰：「汝一念佛，便云『火發』。何故汝終日向人說話，便沒一毫火起耶？當知，此火乃汝無量劫來，無明煩惱之所積聚。由汝今日信之不真，故念隨火起，火逐妄生，以燒汝法身慧命耳。」

「昔，牟尼世尊為大法故，於無量劫捨身求道，所以得成無上寶王。今汝年力已衰，日夕勤行，猶嫌遲暮。尚乃戀著塵勞，希圖丹藥，以求延年益壽！汝不聞，非非想天尚有報盡，劫火洞燒壞至三禪。況區區水、火、鉛、汞，假緣和合之法，而求其永無變滅耶？」

「汝今聞我所言，當如夢初覺，如醉初醒；精修淨土，正念往生。彼世界之壽命無窮無盡，成就法身，到一切智。非淺淺長生久視之術，可同日而論也！」

⑥明達心理

第四十二品 精修除怖

查定宏問：「持咒時，多生恐怖。求示方便。」

菩薩曰：「誰來怖汝？誰是受怖者？由汝夙生習氣不淨，故從微想中忽現此相耳。汝但精誠誦持，自當除滅，得如意意順。能護伏煩惱而造入玄微，何恐怖之有！」

第三節 正修 憶念念佛之法

〔一〕事入憶念念佛之法

第四十三品 隨事憶念

陳定育為母疾致禱，問：「作何功德，可獲痊癒？」

菩薩示偈曰：

「孝首萬德，孝貫三才。  
大哉孝行，人倫之師。  
汝以好心，求癒母疾。  
汝當安適，念母痛楚。  
汝食美味，念母減食。  
汝衣輕軟，念母膿血，  
污其衣襟，露其胸脅。  
如是思惟，夙夜靡虛。  
歸命大聖，精誠不二。  
力行眾善，仰答四恩。  
願母福益，願母壽增，

願母病癒，願母體康。  
覺明菩薩，為汝依怙。  
苟如其言，無願不果。」

〔二〕理入憶念念佛之法

①契理頓法

第四十四品 正念念佛

定茂欲捨持咒而念佛，請問。

菩薩曰：「汝欲捨持咒而念佛，一志專修。最妙！但汝未知法要，只可名為『持齋好善之人』，不得名『念佛之人』。何以故？欲泛大海，必具大舟；欲馳千里，必擇良馬。故念佛人先須具大手段，割絕牽纏，打開塵網。直下即念是佛，即佛是心。乃至離即離非，頓入如來大光明藏。如是乃名『正念念佛』，得名為『念佛人』也。汝應善解此義。」

②推理漸法

第四十五品 推理憶念

有年少僧四人進謁。

菩薩曰：「諸年少！眾生無始時來，因於恩愛，故成眷屬。而眷屬中，父母於子，又為恩之至重，愛之至切，難割難捨。今爾等出家離俗，得為比丘。當知父母於爾，又有恩上之恩，非言所喻。故應趁此壯年盛力，勤辦道業，答父母最初割恩斷愛一片苦心，

方不愧『出家』兩字。若復放逸懈怠，以至終身廢墜，是不孝中之不孝，為天地間極重罪人矣。當因吾語，猛生痛念。」

菩薩又示眾曰：「諸善男子！人之一身，父母所生，父母所育。現前爾等種種營謀、種種受用，即使父母不曾與得一錢，也還是父母生卻你身，故有今日。萬事身為大、身為本。從本而推，豈不是父母之恩難言難盡。所以，佛言：『於父母邊出一高聲重語，尚獲罪無量。』況今有甚於此者耶！若言：『父母或以不堪相加，不得不諍』，則是視父母如路人矣。只可歡然順受，父母自有感悟之日。決不得爭個你非我是，做逆天背倫之人。」

#### 第四節 念佛教理

##### 〔一〕頓法教理

#### 第四十六品 生佛同心

菩薩曰：「諸弟子！當知：十方諸佛是眾生心；十方眾生是諸佛心。是故，憶佛、念佛，則十方諸佛現汝心內。然亦非諸佛之入於爾心，亦非汝心出於諸佛。皆是覺妙本明，不可思議。」

##### 〔二〕漸法教理

#### 第四十七品 功夫成片

菩薩曰：「『心行處滅』，是諸佛常住真心；『心

行處有』，是眾生生死業心。其間不容絲髮。若汝等能綿密加工，使此心無些子空隙，方得幾分相應。

「莫略做半年十月，便謂：『我能苦心修道！』不知此正障道處，切宜慎之！」

「又，功夫雖加，若未到銅山鐵壁，推不倒、移不動處，猶未是『打成一片』。切莫見些影響便即歇手。是為半途之廢，必至棄其前功，毫無所益。此又學道人大病，不可不知。

「要知：佛法如大海，轉入轉深，斷非小小知見之所能盡。應盡形修習，造極為則。切莫作容易想。」

### 第五節 念佛三昧

#### 〔一〕念佛三昧成因

#### 第四十八品 強大念力

菩薩曰：「『念佛三昧』是汝心大勢力之所成，非由他致。今爾等念佛，晝夜不能如一，亂想猶復間真，皆是用心不得力處。」

#### 〔二〕念佛三昧境界

#### 第四十九品 一心不亂

願定成求教。

菩薩曰：「汝來此庵，欲依修淨業，可知道云何得生極樂？」

答曰：「念佛往生。」

菩薩曰：「汝知云何念佛，即得往生？」

曰：「執持名號，一心不亂。」

菩薩曰：「如何是一心不亂？」

定成不能對。

菩薩曰：「吾知汝第能言之，未必能如法行之也。汝諦聽我語。善男子！心本無念，念逐想生。此想虛妄，流轉生死。」

「汝今當知：此一句『阿彌陀佛』，不從想生，不從念有，不住內外，無有相貌，即是盡諸妄想。諸佛如來清淨微妙真實之身，非一非二，不可分別。如是念者，煩惱塵勞無斷無縛，止是一心。必得一心，方得名為『執持名號』，方得名為『一心不亂』。淨業功成，直趨上品。」

### 〔三〕念佛三昧行因

#### 第五十品 觀 聲 觀 心

定成再拜曰：「濁世凡夫心智淺劣，未能深達至理，更求詳示。」

菩薩曰：「汝今當發大願，願生極樂。然後，至誠懇惻稱於『阿彌陀佛』。必使聲緣於心，心緣於聲；聲心相依，如貓捕鼠，久久不失，則入『正憶念三昧』。更欲上進，當廣參知識，博詢高明，自悟『即心是佛』妙諦。汝今當具深信。慎毋學彼庸流，聞而不受。更莫學彼半真半假、半疑半信之徒，名雖受而無誠心奉行也。」

## 第七章 行持之法

### 第一節 居家行持之法

#### 〔一〕念佛為主

#### 第五十一品 儘管念佛

菩薩謂查母曰：「汝何不勤勤念佛？」

答曰：「因添孫兒，時常抱持，恐有不淨。」

菩薩曰：「汝謂不淨念佛，恐怕有罪；不知不念佛則獲罪無量。莫計淨與不淨，只管念去可也。」

#### 〔二〕佛化生活

#### 第五十二品 處世四法

陳永壽問結局。

菩薩示偈曰：

「節欲戒瞋，是保身法。

收斂安靜，是作家法。

隨力婚嫁，是省事法。

行善念佛，是出世法。

守此四法，結局通達。」

#### 〔三〕修出世法

#### 第五十三品 行善念佛

顧善記問終身及行善之方。

菩薩曰：「汝若存正心、行正事，得個正終身。你若存邪心、行邪事，還你個邪終身。至於『善』之一字，隨時隨地可行，大事小事皆是。又兼戒殺放生，隨力捨貧施苦。持念『阿彌陀佛』，迴向極樂，日日不間。如是三年不改，方許你『好心行善』四字。」

## 第二節 出家行持之法

### 〔一〕外 環境設施

#### 第五十四品 藉 境 轉 心

菩薩示無朽曰：「大抵修淨業人，行住坐臥、起居飲食俱宜西向，則機感易成，根境易熟。室中止供一佛，一經、一爐，一桌、一床、一椅，不得放一多餘物件。庭中亦掃除潔淨，使經行無礙。要使此心一絲不掛，萬慮俱忘，空洞洞地不知有身，不知有世，並不知我今日所作是修行之事。如是則與道日親，與世日隔，可以趨向淨業。

「蓋汝生時撇得乾淨，拋得乾淨，念頭上不存一些子根節；大限到來，灑灑落落，不做兒女子顧戀身家、子孫之態，豈不是大丈夫舉動。所以要汝一意修行，別無沾滯，正為此一大關目也。」

### 〔二〕內 修行要領

#### 第五十五品 專 勤 用 功

（菩薩曰：）「至於修淨之法，不出『專』、『勤』

二字。專，則不別為一事；勤，則不虛棄一時。汝今晨起，即誦《彌陀經》一卷，持『阿彌陀佛』一千聲，向佛前回向，念《一心歸命文》，以此文言簡而意備也。此為一時之課。若初起或身心未寧，日止四時；稍寧，漸增至六時；又漸增至十二時。合經十二卷，佛名一萬二千聲。更於回向時，禮佛百拜，亦可分作四時。此為每日常課。餘工不必計數，或默或聲，但攝心諦念而已。

「又，持名之法：必要字字句句，聲心相依，不雜分毫世念。久久成熟，決定得生極樂，坐寶蓮華，登不退地。若餘年未盡，猶得以其所證，為四眾嚮導，報佛深恩。汝若於我所說一一遵依，方不負覺明菩薩示汝正道，令汝出家；方不負三昧和尚為汝剃度，授汝大戒。此非小小因緣，汝莫自生輕慢。慎之！慎之！」

### 第三節 行持通法

#### 〔一〕奮發精進

#### 第五十六品 併日兼程

菩薩示常攝曰：「汝向持《大悲神咒》，祈觀音冥加，速得入道。甚好！但不得一向延緩，使志事不立。要須併日而作，兼程而進。自今當刻定期限，約准數時；杜絕人事，安止一室。每咒百卷作一時。兼禮四明所立懺法一卷，懺諸業障，助發勝功，為一時。晝夜分為六時，以五時持咒，一時禮懺。餘時安坐修禪，深入不思議慧。

「何言乎『不思議慧』？了知『心外無法』，『法法無名』；直下『纖塵不立』，『一念圓融』；不可以思思，不可以議議。故名『不思議慧』。依此妙慧，則心攝於微，攝無攝相。所謂『攝無所攝而不礙於攝』，名『善攝心』也。由心攝故，無事不辦。

「總而言之，無時無在而不心心流入，為持咒攝心之本。自然夙障冰消，定心朗現。或得三昧開發，契本妙心。庶無虛糜歲月，可以刻期進道。

「不然，今日明朝，來年後月，若作不作，欲前不前。保汝百年後，仍自目前行止，斷不能移易寸步也。慎之！勉之！」

## 〔二〕專心辦道

### 第五十七品 斷絕俗緣

菩薩又示常攝曰：「只『強順人情，勉就世故』八箇字，誤卻你一生大事。在今日，決不是牽郎拽弟、打哄過日之時矣。道業未成，無常至速。急宜斂跡韜光，一心向道。不得再誤！」

## 〔三〕注重實修

### 第五十八品 戒浮戒泛

達本奉教出家。

菩薩示曰：「汝老年出家，不得泛學餘事。但誦《彌陀經》，日課佛名一萬二千，自少至多。真真切切求生

極樂。此是一了百當之法。

「莫學世俗愚流，高談闊論，說『性』說『心』；見人念佛，便一概抹去。及叩其所行，不及三家村裡一個不識字的漢子，十字街頭一個念「三官經」的乞兒。枉使擲卻光陰，誤卻大事。

「因汝平日喜說禪而不達要妙，又未必能深信淨土，老實念佛，故發此論。」

#### 〔四〕精益求精

#### 第五十九品 一絲不苟

菩薩又示無朽曰：「《彌陀經》十二卷，佛名一萬二千，不要增，不要減，只依著我行去。但，『經』，要勻勻淨淨，不緩不急、不疾不徐；『佛』，要聲聲心心，不澀不掉、不浮不沉念去。

「至於回向，不是但誦舊文一過。須從自己心中發出真正大菩提願，至誠懇切，普願一切眾生同生極樂。而我心無所著，如虛空等。是名『回向』。

「又，靜坐時，當反觀深究：『佛即我心』，『是心是佛』，不假外求，如心而住，無能無所。如是諦觀，更無二念，是名『修行三昧』。慎勿忘形死心，又落外魔知見。

「如是坐一時，便起經行，又更持誦，有箇次序。若忙忙促促，一氣趕去，謂可完卻一日課誦，便有苟且了局之念，非真正修行矣。大抵學道人，不遵知識明誨，決定勞而無益，未久必敗。慎之！慎之！」

「又，諸經中所談淨土依正莊嚴，須講誦明白。倘坐中、或經行、或禮誦時，淨土現前，便可覺了，不為異境所惑。」

〔五〕業道相應

第六十品 三業修淨

菩薩示陳大心曰：「爾道念增矣，世念亦不減。凡世間一切人我相、名利相、瞋喜相等，不但在身上行出來，始為牽連塵網；但心上略帶些子，即屬障道因緣。爾須要明白：爾但身禮阿彌陀，口誦阿彌陀，心念阿彌陀，不涉分毫別想。便得洗滌乾淨，打破塵網，生極樂國。爾須要明白！」

〔六〕當念無常

第六十一品 勿憂世事

或問終身。

菩薩曰：「汝問終身耶？我這裡沒有斷終身的法。為因菩薩歷劫修行，不曾學得這事。」

「然汝亦太愚癡。終身便不過如此，問他何益！汝何不問：頭兒白了，面兒皺了，身子軟了，無常將次到了。閻羅大王面前，如何抵對他一言半句？免得披枷帶鎖去。這事汝何不問問？」

〔七〕出世正修

## 第六十二品 勿期法會

僧法緣將結期禮《彌陀懺》，先來求示。

菩薩曰：「《彌陀懺》是近代慈雲懺主所集，亦具事、理一心。『事一心』，專於一事。若四相不生，湛若虛空，名『理一心』。此一心難到。外則勤修懺法，以除夙障；內則依理修觀，馴致一心。既得一心，何患不能入道？汝今在期，莫管為自己、為施主；亦莫管長久不長久。只要掃除習氣，打蕩身心，不成『三昧』，誓不休息，便了。

「又，汝在彼雖然次第，但不是個修行地面。若真正要修行，將萬緣放下；一鉢依於十方，一身依於大地；真真切切求度生死，乃為正修行法。

「若區區三載懺期，又夾雜世故，而欲成淨業、出生死。譬如吸風吞霧而求飽足，世上必無之事。汝莫作此大愚癡想，以至凍餒而死也。」

### 〔八〕從速辨道

## 第六十三品 早出苦輪

王師初下三吳，湖寇突發，闔城奔竄。久之事定，稍稍復集。

菩薩示曰：「後六月十三之變，得無驚恐耶？汝等當知，此皆無始劫來不能修善，廣造惡業；所以，生生世世不離此禍。如梁武皇時，八人以兵亂各散。今日又遭兵變，逃竄無地。可見眾生不能超三有、獲

無生，畢竟因緣業報，分寸難免。汝等幸而不死，亦太險矣！三世業果，可驚可怖！汝等尚不一心辦道，早出苦輪。隔世他生，正未了在。奈何！奈何！」

〔九〕一門專修

### 第六十四品 最忌夾雜

菩薩示沈元輝曰：「大凡修淨土人，最忌是夾雜。何謂『夾雜』？即是又諷經，又持咒，又作會，又好說些沒要緊的禪，又要談些吉凶禍福、見神見鬼的話，卻是夾雜也。既夾雜，則心不專一。心不專一，則見佛往生難矣，卻不空費了一生的事！」

「你如今一概莫做，只緊緊持一句『阿彌陀佛』，期生極樂。日久功成，方不錯卻。當授汝一偈，依而行之。

「『阿彌陀』一句，萬法之總持。  
聲與心相依，念茲復在茲。  
感應不思議，蓮開七寶池。」

## 第八章 淨業助行

〔一〕深植善根

### 第六十五品 培育善心

菩薩示定愷曰：「汝既遭大難，幸而得免。自今

當痛思前過，斷其後愆。更無躁心競氣，逞志使能，貽厥身災。今為汝立名曰『愷』。愷者何？慈也，仁也。慈以立身，仁以及物。功名，得不足喜，失不足憂。惟務培育善心，堅固善行，以仰答四恩而已。」

## 〔二〕堅固善行

### 第六十六品 真實行善

一時，菩薩降臨法會。士庶三十餘人未決心疑，咸來咨請。

菩薩憫茲眾等，雖同稟誠心，而不識修行正路，乃垂示曰：「今日之會可謂有緣。但若與爾等說佛法，非所習聞，恐難信入。不若舉一則世典儒書，與眾等一話，或能信得一句兩句。」

「《中庸》說：『或安而行之，或利而行之，或勉強而行之。今日看來，『安』與『利』且莫說起，即『勉強而行』者亦不可得。即如爾等自遇我之後，亦曾發心勉強為善。乃有一旦棄捐，或漸至懈廢者。其故何在？只是將『善』之一字，看得太緩。謂：『行善無功，不如為惡之有效耳』。不知為善若果無功，何以古來聖賢之徒，斷不作些微小惡；善則盡力盡心，必要做到十二分滿足？若果為惡有效，又何故古來仁人君子不惟有效是求，反作無功之事？且現見為惡之人，眼前雖得便宜，到頭幾個有好結局、好斷送、好名聲、好子孫以延其世代？又如世間數歲小兒，見說個『好人』，便知讚美，豈不是為善有大利處？見說

個『惡人』，便要嗔怪，豈不是為惡無大利處？此事極易曉，非是爾等不聰明，真不知得。但是不能實心向善，故一時不細察耳。所以，平日間捨一錢，也要向人說一遍；有句好話，也要向人說一遍。都是從外邊做手腳，全不體會大聖大賢用心切己處。覺得沒滋味，便拋棄了。

「汝等今日若果將真真實實的心，行真真實實的事，無一毫妄想、覬覦於其間。坦坦然樂天知命，守其在我。不見有終身可祈，結局可問，五行、八字之窮通可卜，吉凶得失之可得而趨避。自然無禍不消，無福不至；道與時增，德與歲積，成聖成賢無難矣。此爾將來一定的實事。所以說：『及其成功一也』。反此，則生為無忌憚之小人，死為腐爛之草木，可不痛哉！」

菩薩說是語已，默然而住。

時，眾猶顛顛有待，更有再拜而致禱者。

菩薩曰：「甚哉！爾眾之愚也。聞如是言，竟不生希取之心、反顧之念，只要將胸中兒女、身家之事，一問而後已。苦哉！苦哉！然，菩薩大慈無已，當更說些古話，醒豁爾等癡夢。」

### 〔三〕堅定道心

#### 第六十七品 情正心堅

（菩薩曰：）「一者、學道之士情不正，性則離；心不堅，德乃闕。往往慎於斯須而變於頃刻。若是者，

謂之『造就無地』之流，難以入道。非聖人之誨人或倦而故絕之也。眾中有識者思之！」

〔四〕增益道學

第六十八品 虛心向學

（菩薩曰：）「一者、天下又儘有聰明向上之士，卻為自是之見所障，不成大器。蓋人一自是，決不肯虛心就正有道。其平日所交所接，定是一等庸下之徒，互相稱譽。凡有所為，不復得聞其過，而德業殆矣。眾中有識者思之！」

〔五〕祛除貪欲

第六十九品 不可強求

（菩薩曰：）「一者、世人貪得，都務強求。不知一錢之獲，尚有命焉，而況功名富貴之大？曰：『吾智力可求。』若然，則蒼蒼者天，赫赫者神，將無用乎？即使強求而得，亦是命數合有。不因爾用卻許多齷齪心機，天憫而與之也。然則，勉強而求者，有辱無榮，有失無得；有戮身之禍，無利物之功；有損德之災，無進善之福。天厭之，神棄之矣。眾中有識者思之！」

〔六〕敦倫盡份

## 第七十品 孝 養 父 母

（菩薩曰：）「一者、天下大恩莫過父母。父母而在，堂前活佛也；父母而歿，猶可追報也。試思此身從何而來？何由而長？乃不能反本尋源，盡心盡力，敬事承順。而至有結怨於父母而不顧，自利其妻子而不養。更甚至有病而不知，死而不葬。或一言亦報復如平人者。是皆禽獸所不若也。嗚呼！人而禽獸不若耶？可畏哉！眾中有識者思之！」

〔七〕正命敬業

## 第七十一品 勿 謀 倖 進

或欲求官，問：「可得否？」

菩薩曰：「做官一事，你更莫想。你須知得：通經史之謂『文』，練韜略之謂『武』，膂力過人之謂『勇』，智能出眾之謂『才』。汝自思量：有一於此否？若四中不具其一，要做官，不過圖僥倖而已。

「要圖僥倖，念頭先已不正。一做了官，便去假威仗勢，一味虐斯民而飽我腹，決不思為國為民做些好事。以至積惡日深，不知改悔。來世定作牛、馬、駝、驢，有力報人等畜。如目前兵戈戰陣中一類畜生，皆夙世冒祿貪功，無一毫功德於天下之徒也。且報應之理，遠近無期。或致禍於現世，或殃及於子孫。如目前一等罪犯囹圄，身受屠戮；繼嗣不肖，或絕滅無傳者是也。

「又，損害良民而取其財貨，謂之不仁不義之物。以之祀祖先而祖先益愆；事神明而神明加怒；供諸佛聖賢，必為之墮淚；奉仁人有道，反為之生慚。即罪惡不極，而冤結相酬，後世定作一類羊、豬、雞、犬無力報人之畜，及世間一等貧窮、下賤、劇苦之人。」

「又，此圖僥倖一輩，在官即做些好事，亦未免公中有私，善中有惡。罪福影響，不漏絲毫。貪有限之榮名，受累生之惡果。僥倖做官，溺心利欲。如上所談，勢所必至。可不畏哉！」

〔八〕廣積陰德

第七十二品 戒殺寡愆

王定佑求子。

菩薩曰：「汝自今莫殺生命，勿食異物，勿多慾逞忿。何以故？殺生，傷天地之慈，乖長養之道。食異物，必增淫穢，或致惡疾。多慾逞忿，則戕損壽命，暴折元和，又多犯陰陽之忌。汝當永戒此三。一意奉養老母，推惠行慈，濟貧拔苦，廣行陰德，積累不廢，天必錫汝佳胤也。」

〔九〕勸進行者

第七十三品 勸母修行

菩薩示陸定息偈曰：

「親近老成，莫狎惡少。」

君子上達，汝曹當效。  
勸母修行，是為大孝。  
必誠必敬，遵菩薩教。」

復示曰：「回去向爾母親，諄諄切切，勸她至心念佛，求生極樂。即不能素食，莫勉強她。但不可殺生。她若肯歸向彌陀，自斷血肉，此是世間第一等孝行。汝宜勉之。」

## 第九章 付囑勉勵

### 〔一〕分別付囑

#### 第七十四品 應機付囑

爾時，菩薩化緣已終，因遍召諸弟子，各授以訓。示定勉曰：「汝名定勉，當號『自開』，勉力修行，自得開悟無上菩提；作善知識，續佛慧命。汝毋自棄。」

定開問「一心三觀」之旨。

菩薩曰：「台宗『三觀』，妙在『圓心』。

圓心若知，其道盡矣。」

令與定勉並立，付偈曰：

「一『開』二『開』，今日重來。

菩提有種，妙手雙栽。」

示上德曰：

「頭既禿，當知足。  
念無常，斷愛欲。  
南無阿彌陀，念念恆相續。」

示耳之曰：

「勤則不病，不勤則病。  
勿謂夙業，其報甚近。  
慈父彌陀，數數親覲。  
可以永年，況乃卻病。」

示陳大心曰：

「老不撇脫，死定兜搭。  
兒女債完，可以怡悅。  
極樂非遙，勿自隔絕。」

示沈元輝曰：

「深潛不露，是名持戒。  
若浮而外，未久必敗。  
念既不真，不得自在。  
禍福吉凶，汝自作怪。」

示杜義見曰：

「善則為義，不善不義。」

義善無二，所見唯義。  
以義為見，不見非義。  
見非義時，見無見義。」

示女弟子意安曰：「汝因病不念佛耶？噫！病愈甚，念愈勤，乃好也。若病到念不得的時節，卻是錯了也。」

示無朽曰：

「尺璧豈寶，寸陰當惜。  
正念彌陀，信光赫奕。  
莫貪舊遊，前途永失。」

示常攝曰：

「有口若啞，有耳若聾。  
絕群離俗，其道乃崇。」

示常源曰：

「汝行勿怠，怠非比丘。  
彼自廢者，多身後憂。」

示定茂曰：

「汝是道人，當淨其心。  
能淨心者，可以超群。」

示定隨曰：

「老實是寶，又有不好。  
若只如此，止堪溫飽。  
何用出家，願離癡惱。  
當發道意，莫空過了。」

示查定宏曰：

「菩薩說偈，家常茶飯。  
歸告汝母，已事早辦。」

示陳定崑曰：

「惟天最高，無所不見。  
護汝初心，慎勿少變。」

示達本曰：

「達本無本，萬緣應息。  
胡不寧處，猶是汲汲。  
一朝撒手，男耕女織。  
回想生前，汝自哭泣。」

〔二〕 集體付囑

① 初囑總示

第七十五品 囑 遵 教 法

時，菩薩一一示已，復告諸人曰：「我自降此以來，凡所言說，皆修行要妙。汝等能時時體會，極力

遵行，決生上品。菩薩從此不復再來矣。諸弟子宜各努力，勿虛此會。」

②再囑勉勵

第七十六品 勉勵自強

時，諸弟子聞菩薩語，皆涕泣悲戀，不能仰視。

菩薩謂曰：「諸弟子！汝等謂菩薩不復再降，恐生懈怠，從此失足。然實不爾。何以故？從是以後，汝等精進，只是自己精進，捨塵塗而登聖域，大智大賢之所為也。若懈怠，亦是自己懈怠，背大道而入淤泥，無知下愚之所為也。諸弟子！但須前進，莫生係戀；但急著力，無事悲哀。」

③三囑辨正

第七十七品 嚴令奉教

頃之，復論曰：「汝等不得更作菩薩再降想。所以者何？鸞乩之設，本為鬼神所依憑，非大菩薩應化常事。汝等若奉教無失，於菩薩生恭敬之心，難遭之想，即是大報恩處。」

〔三〕緣盡會終 護念不捨

第七十八品 法會圓滿

時，諸弟子雖聞法論，猶故圍繞，不忍散去。

菩薩又諭曰：「諸弟子！菩薩往昔因中，與汝等具有大緣。從此雖不再降，然不得作遠離想。當知，覺明妙行時時在汝等眼前，相逐不捨。汝等慎無一日廢弛，自捨卻覺明妙行也。」

少頃，又諭曰：「諸弟子！法會既終，宜各散去。菩薩來無所從，去無所至。莫只呆呆守著，菩薩定不在一幅紙兒上也。各念一句『南無阿彌陀佛』，至誠作禮，頂戴奉行，可矣！」